

SAOPŠTENJE ZA JAVNOST

ZZO ZDK usvojio Plan hitnih mjera za očuvanje stabilnosti zdravstvenog sistema

Upravni odbor Zavoda zdravstvenog osiguranja Zeničko-dobojskog kantona na sjednici održanoj 02.07.2025. godine donio je Plan hitnih mjera s ciljem očuvanja finansijske stabilnosti Zavoda zdravstvenog osiguranja Zeničko-dobojskog kantona i zdravstvenog sektora u Kantonu. Ova odluka rezultat je odgovornog upravljanja u uslovima pojačanih fiskalnih pritisaka izazvanih padom prihoda, rastom troškova za lijekove i povećanom refundacijom bolovanja.

Najveći izazov predstavlja najavljeno smanjenje stope doprinosa za zdravstveno osiguranje, koje stupa na snagu 1. jula 2025. godine. Ova zakonska izmjena, iako strateški usmjerena ka rasterećenju privrede, u kratkom roku dodatno će umanjiti prihode Zavoda, čime se značajno povećava pritisak na budžet zdravstvenog sistema.

Uprkos složenim izazovima, ZZO ZDK ostaje potpuno posvećen osiguranju dostupnosti zdravstvene zaštite za sve osigurane osobe, bez narušavanja obima ili kvaliteta osnovnih usluga. U prethodnom periodu već su provedeni brojni sastanci i konsultacije sa zdravstvenim ustanovama, komisijama, stručnim timovima i relevantnim institucijama, kako bi se obezbijedila puna koordinacija u suočavanju s novonastalom situacijom.

Usvojene mjere podrazumijevaju racionalizaciju rashoda i poboljšanje kontrole u najosjetljivijim segmentima ali bez dovođenja u pitanje prava pacijenata i funkcionalnosti zdravstvenog sistema. Fokus Zavoda ostaje usmjeren na pacijenta, efikasnu zdravstvenu zaštitu i stabilnost partnerstva sa svim zdravstvenim ustanovama u ZDK.

Zavod želi jasno naglasiti da je zdravstveni sistem zajednički resurs svih građana i da je odgovorno upravljanje javnim sredstvima obaveza svih učesnika, od institucija, preko zdravstvenih radnika, do samih korisnika usluga.

U narednom periodu, ZZO ZDK će nastaviti pravovremeno informisati javnost o daljim aktivnostima i poduzetim mjerama, u duhu potpune transparentnosti i u interesu svih osiguranika.

Zenica, 02. juli 2025. godine

